




Stiftung für eidgenössische Zusammenarbeit
Fondation pour la collaboration confédérale
Fondazione per la collaborazione confederale
Fundaziun per la collavuraziun federala



FÖDERALISMUSPREIS
PRIX DU FÉDÉRALISME
PREMIO PER IL FEDERALISMO
PREMI DA FEDERALISSEM

10
JAHRE
ANS
ANNI
ONNS

13 da zercladur 2023

Communicaziun a las medias

Il Campus per la democrazia gudogna la dieschavla ediziun dal Premi da federalissem

La furmaziun politica è essenziala per in bun funcziunament da la Svizra. La lavur dal Campus per la democrazia – en spezial la coordinaziun dal Di internaziunal da la democrazia – vegn undrada cun il Premi da federalissem 2023. Il project Constitutio survegn ina menziun speziala.

La participaziun a la debatta publica ed a la vita politica è ina garanta d'ina democrazia viva. Ma per che quai gartegia ston ins savair co che la politica funcziuna en Svizra. Infurmar bain la populaziun è d'impurtanza centrala. La societad civila, la politica e la scienza daventan adina pli conscientas da la necessitad da rinforzar la furmaziun politica. Diversas mesiras ed acziuns fitg differentas cun effects a lunga vista èn vegnidas lantschadas l'ultim temp en tuttas parts dal pajais.

Quest onn ha la giuria vulì premiar dus projects davart quest tema: Il Campus per la democrazia gudogna il Premi da federalissem 2023, Constitutio survegn ina menziun speziala. La surdada dal premi ha lieu ils 5 da settember a Berna.

Quai che characterisescha il project victur

Il [Campus per la democrazia](#) è ina plattafurma naziunala per la furmaziun e la participaziun politica, constituida da la Fundaziun Dialog. Cun agid da projects collia el acturas ed acturs da differents champs, als fa visibels ed als metta a disposiziun divers meds d'agid (dossiers tematics, basas da lavur u bunas praticas).

Dapi il 2021 coordinescha il Campus per la democrazia mintg'onni ils 15 da settember il Di internaziunal da la democrazia en Svizra. La finamira è d'intimar personas da tuttas parts dal pajais da sviluppar acziuns che animeschan da scuvrir, reflectar e d'experimentar la democrazia (discussiuns, exposiziuns, lavuratori, etc.). La plattafurma organisescha inscuters regiunals per sustegnair las participantas ed ils participants cun la preparaziun. Las iniziativa vegnan silsuent publicitadas sin la pagina-web. L'onn passà hai dà uschia passa 100 occurrenz. Sa participar pon ins era senza avair la naziunalitad svizra.

«Il Di da la democrazia è participativ e sa drizza ad in vast public cun differents projects sco exposiziuns en scolas, cafés per migrantas e migrants u discussiuns da podium», di Florence Nater, presidenta da la giuria e da la Fundaziun ch. Ella considerescha la lavur prestada per quest di sco fitg preziusa, perquai ch'ella animescha uffants, giuvenils e creschids da s'interessar per la

democrazia: las differentas furmas d'engaschament vegnan fatgas visiblas ed accessiblas per la publicitad en tuttas linguas ed en tuttas parts dal pajais. Plinavant sa tracti da projects decentralisads, locals e regionalis che han ina gronda influenza en lur totalitad. «Questa occurrenza festivescha la democrazia e rinforza uschia la coesiun tranter tuttas regiuns.»

In onn decisiv

La furmaziun politica stat quest onn en il center da l'activitad da la Fundaziun ch e da la Conferenza da las regenzas chantunalas. Il mars ha la Fundaziun ch lantschà la nova [Conferenza interchantunala Citoyenneté](#). La CdC organisescha per ses [giubileum da 30 onns](#) inscunTERS en l'entira Svizra cun giuvenils e giuvens creschids interessads. «La lavur dal Campus per la democrazia rinforza la chapientscha per il federalissem e motivescha la generaziun giuvna da sa fatschentar cun la politica. Omadus elements consolideschan noss sistem politic», manegia Markus Dieth, commember da la giuria e president da la CdC.

La Constituziun federala en suns e purtrets

La giuria ha suttastritgà la qualitat dal project [Constitutio](#) e l'engaschament da ses iniziants, il fotograf e cineast Dominic Büttner. L'iniziativa vul dar ina fatscha ed ina lingua a la Constituziun federala che festivescha il 2023 ses 175avel anniversari: davant la camera prelegian abitantas ed abitants da la Svizra tut ils 195 artigels constituziunals en tut las quatter linguas naziunalas. Per far quai viagia il Turitgais tras l'entira Svizra e mussa la diversitad dal pajais cun personas da tuttas vegliadetgnas e cun differents origins. Da la ministra da giustia al requirent d'asil refusà, da Porrentruy fin la Val Müstair. Cun questa menziun particulara vul la giuria suttastritgar che quest project, gia publictà per tudestg e franzos e per part era per talian e rumantsch, merita sustegn supplementar per ch'ins possa realisar ina versiun udibla e visibla da la Constituziun federala en tuttas quatter linguas.

Contact ed infurmaziuns

Cussegliera guvernativa Florence Nater, presidenta da la Fundaziun ch (032 889 68 00)
Alexander Arens, vicemanager partiziun Fundaziun ch, a.aren@chstiftung.ch (031 320 30 05)

Fundaziun ch: ina fundaziun per ils chantuns

La Fundaziun ch per la collavuraziun federala è in'organisaziun interchantunala da tut ils 26 chantuns. Ella s'engascha per l'idea dal federalissem e promova la chapientscha tranter las cuminanzas linguisticas e las culturas sco era la collavuraziun tranter ils chantuns e cun la Confederaziun.